

Happy
New
Year

KRISTIAN THALAI

January
2015



Kristian Thalai Pawi Chanchinbu thla tin chuak

Vol V No. 11



Kristian Ṭhalai Pawl chanchinbu thla tin chhuak

1970-a chhuah tan ■ Kum 44-naa wawi 11-na ■ Chhuah tawh zat : 435

Editor :

T.Upa Lalmuanpuia

Joint Editors :

Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager :

Tv. R. Lalramghaka

A lak man :

Kum khatah - Rs. 60.00

Copy khat - Rs. 5.00

Thu chhuah tūr nei chuan Editor, Kristian Ṭhalai, Synod Office-ah thawn tūr a ni a; a la dah chuan KṬP Office-ah a man pèk làok a ngai.

Office Phone : 2326372/2335821

**E-mail : kristianthalai@yahoo.com
centralktp@gmail.com**

Visit us :

cktp.blogspot.com

www.facebook.com/centralktp

KRISTIAN ṬHALAI PAWL

Thupui

Rawngbawl tūra chhandam

Thupui inngahna

Ephesi 2:10 Thil ṭha ti atán Krista Isuaah chuan siama awmin, ama kutchhuak kan ni si a, chu thil ṭha tih chu kan awmna tūrin Pathianin a buatsaih làwk a ni.

Thil tumte

1. Isua Krista rinna leh amah anna kawnga ṭhalaite hruai.
2. Kohhran kut ke ni tura ṭhalaite buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1. Editorial	1
2. Hma i sawn zel ang u	2
3. I tan ni a la tla lo ve	5
4. Hausakna	9
5. Tuipuibari II Work Camp	13
6. Tun hun	16
7. Kristian Ṭhalai leh infiamna	19
8. K.Ṭ.P. Rorel Inkhawm 2015 programme	23
11. <i>Hringlang tlàng</i> – In ruaka thuhrlil	26
12. <i>Rimawi</i> – Lalpa beramhote chu	27
13. Keimahni	30



Ṭan la zel ang

Kum thar lâwmatwm, kum 2015 chu kan lo chuang kai ta reng mai. He hun thar min hruai kaitu Pathian chu fakin awm sela. Kristian Ṭhalai chanchinbu chhiartu zawng zawngte **KUM THAR CHIBAI** kan bûk a che u. He kum tharah hian Pathian duh zâwnga kan nun theih nân a hnênah i inhlân thar ṭheuh ang u.

Mihring taksa hi chu kan hrisel dan leh kan hun tawn dan athua tihthar theih loh chin a awm. Mahse, kan rilru leh kan ngaihtuahna hi chu eng lai pawhin a tihthar fo theih a ni. In thar luah ang deuhin tunah hian kum thar 2015-ah kan lo lut ṭan mek a. He kum thar hi eng mahin a la tihbalh loh, hun thar, hun thianghlim a ni a. Rilru thar leh thianghlim tak pua kan luah ṭheuh theih nan leh Lalpa tan inpekna thar kan neih theih nana **kum thar, hun thar duhawm** lo ni thei se a duhawm ngawt mai.

Kan chanchinbu pawh hian kum tinin malsâwmna a dawngin a copy pawh a pung nasa ṭhin hle. Hetianga hmasâwmna nei tûr hian a enkawltute ṭan lâkna ni barok mah sela Branch/Agent te kaltlang lo chuan eng mah kan ti thei lo. Chuwângin, kan hmasâwmna hi agent fel leh taima tak takte bâkah chhiartute duhsakna tling khawm vâng liau liau a ni tih kan hria a, hmasawm zel tûrin kan inchah barok a ni.

Kristian Ṭhalai Chanchinbu hmasâwmna atân hian thuziak mite an pawimawh hle. Thuziak mite hian an thuziahte hi rawn theh lût lo ta sela, kan ṭhuanawp a ni nghâl mai. Hei vâng hian thuziak ṭha tak tak rawn theh lût zêl tûrin kan inngên a, kum tharah hian ngaihtuahna thar nêh mite tâna malsawmna ni tûrin ziak miten ṭan rawn la sauh sauh teh u khai.

A tâwp berah chuan a man pèk chungchângah barok lût leh ta ila. Kan chanchinbu hi amah leh amah inenkawol tûra tih a ni a. Hei vâng hian a lâkna man pèk chungchângah hian ṭan kan lâk a ṭûl tak meuh a ni. A chhut man atân ringawot hian thla khatah chêng nuai hnih dâwn pèk chhuah a ngaih reng avângin a lâkna man hi Office-ah kan theh luh ṭhat a ngai a, harsatna kan tawh loh nân ṭan i la lâng ṭheuh ang u ♦

Moderator Kum thar thuchah**Hma i sawn zel ang u**

— Rev. Lalrinmawia,
Moderator. Mizoram Synod

Kum 2015 kum thar kan lo thleng leh ta hlawl mai. Dam taka min hruai thlengtu Lalpa chu fakin awm rawh se. He hun thar hian Kristian Ṭhalai chhiartu zawng zawng hnenah Malsawmna tam tak thlen turin duhsakna sang ber ka hlan e.

Synod Moderator thuchah han ziah ve dawn chu insit a nain phu lo kan inti hle mai. Chutih lai chuan ṭhalai tam takte hnena Moderator thuchah zia theia min siama, zia k tlaka min ngaitu Pathian hnenah lawm thu ka sawi a ni.

1. Ṭhalaite hi Pathian hmanrua kan ni

Mizorama kohhran ropui taka a lo din theihna leh Chanchin Ṭhain hmun

pawimawh tak a la luah reng theihna chhan hi Ṭhalaite inpekna vang a ni.

Khawtlang nawm leh nawm loh hi a chhunga cheng ṭhalaiteah a innghat lian em em mai a. Ṭhalai an ṭhat leh khawtlang a nuam a, an ṭhat loh leh khawtlang a hrehawm an ti ṭhin. Chutiang bawkin Kohhranah pawh kan mawh phurhna a lian em em a ni. Chuvangin, kohhran leh khawtlanga kan mawhphurhna ṭhalaiten hre thar lehin, kum 2015 chhung hian kohhran leh khawtlang nuam siam turin ṭan i la thar zel ang u.

Kohhran hmasawmna pawh hi ṭhalaite kovah a innghat thui hle. Tuna rawngbawltu tam tak zingah hian ṭhat lai huna Kohhrana

inhmang lem lo awm mah se a tam ber hi chu vanglai huna KṚP bêla chhum hminte an ni. Chuvangin, Pathian hmanrua chherchhuahna pûm pawimawh tak chu KṚP hi a ni. Kohhranin hma a sawn nan leh a lo puitlin zel theih nan KṚP-ah ṭan i la thar zel ang u.

2. KṚP kum puan

Kum 2015 KṚP kum puan hi a pawimawh hle mai. Khawvelah Pathian ram a zau zela, Kohhran a lo ropui zel theih nana thil pawimawh ber chu khawvel laka danglam ngam nun a ni. Daniela ṭhiante chuan Lal thupek tidanglamin an taksa an hlan ngam a. Chu chuan Babulon ram zawng zawngah Pathian ropuizia a puang ta. Eng mah sawi an nei lo. Pathian ropuizia puang turin mi fing leh ropui nih a pawimawh ber lo. Lal Isua avanga danglam ngam nun neitu avangin Pathian ropuizia puanin a awm ṭhin. Ringtu, piangthar khawvel laka danglam chuang lo tam lutuk avangin Pathian thuin hna a thawh tur angin a

thawh theih loh phahin kohhranin a nih tur ang a nih loh phah bawk a ni. Chuvangin, khawvel laka danglam ngam nun neih hi a ṭul hle a ni.

Mi mal nunah pawh Pathian duh dan zuia khawvel laka danglam ngamten thlarau pawlna thar an chang ṭhin. Chu mai ni lovin Pathian hriatna kawngah an ṭhang duangin, rawngbawltu hman tlak an ni ṭhin. Mahni tan leh kohhran tan Pathian ropuizia puan a nih theih nan ṭhalaite kan danglam ngam a ṭul hle a ni.

3. Evangelism lamah

Ṭhalai member zingah inkhawm ngai lo an tam hle mai. Za-a sawmruk vel hi chu inkhawm ngai lo kan ni mai thei. Heng zawng zawng hian an chaw zawnnaah ei tur ṭha an hmu dawn lo tih hi kan hriat sa vek a ni. Hlimna an zawn hian hrehawmnaah a hruai lut dawn tih chu a chiang sa a ni. Zalen taka nun an duhna chuan bawihah a siam ngei dawn. Nuam an

duhna avangin lungngaihna ruamah an lut ðhin. Beidawngin mahni nun ngei pawh thlakhlelh tlaka ruat lovin mahni nun la ta pawh an awm nual reng mai. Kan vei lo a ni lo va, kan lainat lo pawh a ni lo. Mahse, tihngaihna hre lovin, hmalakna tur thar pawh hre lovin kan tawp mai thei bawk. Setana hnathawh avanga beidawnga chauva tluk tlan mai pawh hlauhawm tak a ni. Chuvangin, tichaktu thlarau thianghlim kan mamawh tak zet a ni. Lal Isua chawimawi a niha, hnehna leh ropuina a chan a, saltang an chhuah theih nan Thlarau Thianghlimin a hman theih tura inpek thar a ðul hle mai. Chanchin Tha hlawhtlinna

chu Thlarau Thianghlim hnathawh aţang chauhvin a ni si a.

4. YRC hi

Kum tam tak kan lo nghah tawh YRC hmun tur pawh Pathianin Synod hruaitute hmangin min pe ta. Hmun nuam leh zau, duhthusam... kan beisei aia ðha kan nei ta. A tihpuitlin chu member-te kovah a innghat ta. A puitlin theih nan ðahnemngai takin i thawk ang u. Tha thawh phatu pawhin tha leh sum sengin, tha thawh ve pha lo pawhin sum leh pai thawhin, a puitlin theih nan ðahnemngai takin i thawk zel ang u.

Chhiartu zawng zawng
Lalpan malsawm rawh se♦



KRISTIAN THALAI NGENNA : Kum thar kan lo thleng leh ta a. Kan chanchinbu hi amah leh amah inenkawol tura tih a nih avangin a man p k chungch ngah hian ðan kan lâk tlan a ngai a. A chhut man at n hian thla khatah ch ng nuai hnih d wn p k chhuah a ngaih av ngin lak man kan theh luh ðhat a ngai hle a ni. Kan tih dan pangngaiin a lakna man hi pek lawk leh ðheuh tum ila, pe lawk thei lo te pawhin K TP Rorel inkhawm, Mission Venga neih turah hi chuan ken ðheuh tum thei ila, a lawmawm hle ang♦

I tan ni a la tla lo ve

—Lalrimawia Khiangte
Sailutar



unlai thalaiten an thil sawi dan, sawisel an duh lo va, an thu leklam ber pakhat chu, *“min lo sawisel ve chhen suh, ka nun a ni a, ka thu thu a ni, min lo vei ve chhen suh,”* tih hi a ni awm e.

Ni e, an nun a ni a, an duh dan danin an hmang thiang alawm. Lo inrawlh ve chhen suh u! Thalaite u, hei hi ka chah duh che u, i nunna kha i ta a ni lo, a siamtu ta a ni zawk. Siamtuin i nunna kha a kawl hawhtir mai mai che a nih kha. Mana lei i ni asin. Isua thisena lei leh tlan i ni a. I man hi a to lutuk. Thil siamtu chuan a thil siam chu a duh hun hunah a tichhe thei a, a siam tha thei bawk. I nunna kha nangma ta emaw i tih chuan i siamtu i hnaih thei lo vang. I nunna kha a siamtu hnenah a kir leh

dawn a, i siamtu hmaah i inlan a thul ang a, chutih hunah chuan nanga ta emaw i tih i nunna kha i ta a nih lohzia leh i thu a nih lohzia chiang takin tar lan a ni ang a. I tlai tawh ang.

“Min lo sawisel ve chhen suh’

...tiin i nun kha an sel thlin maw. A dik e. Mi dang sawisel hi a tha lo reng a ni! Mahse maw, i nun kha sawisel ngai khawpa a awm chuan i ngaihtuahawm hle tihna a ni mai lo maw? Sawisel ngai khawpa i nun a lo awm chhan kha eng nge ni ta ang? Ni e, sim tur i nei atin a ni. Chu chu nangmah khan i hre chhuak thei mai lo va, hre chhuak turin beih i tum bawk hek lo a ni. Mahni inhriat chian hi khawvela thil harsa ber pawl a ni tih hre bel hle mah la, mahni inhre chiang turin mi dang darthlalangah i hmang thiam si lo va, an selna leh an khakna che na i ti hle ang chu. Fel famkim kan awm hauh lo. Nun tluang pangngai a awm tih hria la, chu chu zawm tum hram teh.

‘Min lo vei ve chhen suh’

...i ti ðhin maw? Vei ngaiin awm miau hek che maw le! Kristianna in a tum pakhat chu nun kawng dik zawhtir hi a ni. Setana kawnga peng bo mekte hruai kir leh hi Kristian ðhalaiten kan tum ber pakhat a ni asin. Vei ngai khawpa i nun a lo awm a nih chuan i inen let fe a ngai tawh tihna a ni mai lo maw? Inkhawm i inthlahdah a, i ðawngðai ngai hek lo va, Bible chhiar chu sawi loh, melh pawh i melh ngai lo hrim hrim a. Inkhawm ahnekin inkhawm ðhinte i sawisel zawt zawt a. An mahni aia ðha zawkah i indah a. Pathian thu a mawi tawkin, hnial khan hre tawh chauhin i hre nial nual a. Chuti chung chuan ‘min vei ve chhen suh’ i ti maw. Tu nge vei lo phal zawk ang che! Kan vei che hi kan inchhir lo va, manhla kan ti zawk asin.

I khawlai nun kan hmu a, kan hria e. I inchei dan leh awm dan kha Krista Chanchin ðha nen inmawi tur a nih laiin khawvel nen

inmawiin i inchei a. Kristianna aţanga kan thlirin, kan vei che hi kan tifuh thlawt. Isam i sawngbawl dan te, i kawr leh kekawr hak duh dan te, i music ngaihthlak duh zawng aţang te, i thil sawi duh dan aţang te hian vei awm i nih leh nih loh a lang reng asin. Nang ðhalai, vei tura i awm chhung chu kan vei reng ang che a, i tan kan ðawngðai reng bawk ang.

‘Ka thu thu a ni a, ka duh dan danin ka awm ang’

...tiin chhuamlam i la siam fo maw? Hei hi hre rawh, i duh dan chuan awm ta che! Mahse, i chungah Pathianin ro a rel dawn. Rei a rial tawh lo vang. Chutih hunah chuan i thu thua i awm rah i seng tawh ang a, i inchhir hle ang. I duh dan dana i awmna rah kha tunah pawh i seng tawh pang a ni lo’ m ni? Vei ngai khawpa i awm tak mai le. Nang ðhalai, khawvel mite angin Zu i sawi mawi maw? ‘Ka duh leh ka in ang a, kohhran hian an tih tur ti mai rawh se’, ti pawl i ni ve em? Heng mite hian kohhran

nihna leh a hnathawh an hre thlawt lo va, hre turin an inkhawm peh na hek lo. Zu in mite hi Thlarau Thianghlimin a pawl zui i hre ngai lo ang. I fak mawi chawp a, thatna awm miah lo, a thatna lai zawn phet i tum a. Rawngbawltute hmusit leh nuihsawh takin i thatng ve maw. A rah chu i la seng mawlh ang. Nangmah hmangaihtu che, he kohhran hian a hmusit let ve dawn lo che a, khawngaihna kutin i lamah ban a phar reng a. I lo kir leh a nghak reng asin. I tan kohhran hi a thatngtai reng baw ang.

Just do it leh It's my life khawvelin a nuai che a. Nangmah hmangaihtu kohhran i hmusit a, i tana thatngtaitute i deusawh a. Ngai rawh, rorelna ni i hlat tawh lo ve. Khawvel mite angin zu leh sa i chen a. I hnung lam thatngin i khawvel thatiante pawhin 'hremhmun sarep' tiin an nuihsan che a. Thu that hrilh thatintu che lah barah i khawnsak duh lo va. Khawvel mi nihna hi

hremhmun kawngka a ni tih hre lovin' min lo vei ve chhen suh' ila ti zui a nia! Setana hian a tum ber chu i nun tihchhiat vek hnua hremhmuna hruai che a ni. Chumi kawng chu i zawh mek a. Nangma nun vei em emtu hnenah 'ka nun alawm' ila ti pang pang ngam a nia! I huaisen thlawt e; mahse, huaisenna dik lo, Setana fuihpawrhin i awm a nih kha. I nunah Setana a va huangtau em!

Mi thiam leh fing, hnial khan hre tak, khawvel dinnaa hruai boten na takin kohhran an do va. Ar chuk tui lo khawpin an chhuah a. An zinga mi i ni ve em? Khawvel finnaa khat, Pathian duh loh zawnga awm tlatte hi Pathianin 'mi a' a tilte chu an ni. Kohhranin ram siam thatnaah tha thawh a tum hleka teu ta hlar mai i ni ve mial em? Mi fing leh thiam pawh ni mah la, Pathian ngaihah mi mawl i ni tho tho. Heng mite hi Nilai zan, Inrinni zan leh Chawlhni chawhnu inkhawm taima tak an awm kher lo vang. An zingah tel

suh la, thurualpui hek suh.
An hruai bo mai ang che.

Facebook leh WhatsApp etc...-a i status update dan aṅang hian e...sim tur i neih leh neih loh chu nangmah ni lovin i ṭhianten an hre Chiang hle ang. Inkhawm nan hun rei ti hle si, zan khaw tairek thlenga facebook khawih peih ṭhalai i nih chuan vei awm berte zinga mi i ni ngei ang. Nang ṭhalai, tunlai mil hian i nun hman tum ve phet suh ang che. 'Pathian thu hi tunlai khawvel milin a kal ve tur a ni lo va, khawvel hi Pathian thu milin a kal zawk tur a ni."

I thuin thiam a chantir ang che a, i thu vekin thiam loh a chantir dawn che. He khawvelah hian Lal Isua tan i thi lo a nih chuan hmelmapa Setana avang hian i thi dawn tho tho. Chuvangin, i duhthlanna kha hmang thiam hram teh. I wawiin hun hman dan hian i chatuan hun tur a hril tih hria ang che. I duhthlanna avangin

vanram i kai thei a, i duh reng vang hian hremhmunah i kal thei bawk. I tan hian ni a chhuak reng dawn hauh lo, i ruang dai chungah kohhran hian i chanchin an la sawi dawn a, kohhran hian i pualin dar an la vaw dawn asin. Chu hun chu i hlat tawh kher lo vang. He lei kohhran, van kohhran nena inzawm hi ngaine pin, sawisel ṭhin mah la, i ruang chungah ngei khawngaihna mittui nen kohhran hian an vui liam dawn che a ni.

Nang ṭhalai, inngaihtuah harh teh le. I nuna pawimawh ber Lal Isua i neih si lohva, khawvel i chen chiam khan Setanan a hlawkna a tel daih asin. Nangmah leh nangmah kha i inbum vel mai mai a ni. Kan biak Pathian hian mi fel leh mi sualte chungah pawh ni a chhuah-tir a, ruah a surtir bawk. Tuna i nun hman dan kha inchhut let vang vang la, nangmah infiah ṭhin la. Vei ngaiin i lo awm reng em le? A la tlai lo. I tan ni a la tla lo ve♦

Hausakna

— Pastor Lalfakawma Ralte
ATC

Damlo pakhat ka hriat chian chu a dam that lai zawnga thlarau hrêk chêr ve chi, tisa châwm thau lam ngaihtuah nasa mi a ni a. A theih anga nasain a inkhawl khawm a. Thihna kut vâwt chuan amah a rawn ban phak ni a la thleng ang tih a ngaihtuah pha lo a ni. Thatlai a ni a, a vanglai takin a nunna chu laksakin a awm dawn ta a. A hmaa sum leh pai, thi, ngun, zungbun leh thil dang a lo lak khawm sate chu a dam lohna khumah a dahtir a. A vawn sen tawk a vuan a, "Awi, heng ka thil zawng zawngte hi ka thihsan ang maw! Mi dangin min neihsak ang maw, ka phal thei lo!" a ti a, a tap chhuak râwih râwih mai nia. Chu chu kumin chhunga thil thleng ngei a ni. Ei tur, thil hlu, rangkachaka chei tlereuh leh tisa mamawh dangte chu a

nei a; bungruaah a hausa a, a nun a hausa si lo a ni.

Mahni tana thil tha chhek khawl tum hi khawvel changkan hma daih pawh khan a awm tawh ang tih a rin theih a. Khawvelin changkanna lama ke a pen nasat hnu pheih chuan a nasa leh zual a. Mizoram pawh hi Chanchin Tha zarah nasa takin hmasawna kalkawngah hnung lam hawi tawh lovin hma lam panin kan kal mup mup reng a. Mi tam tak thinlungah mahni tana engkim hai luh duhna, a tawi zawnga sawiin hausak duhna a lo lian ta hle a ni. Chu rilru avang chuan mawi leh mawi lo leh Pathian thu leh thu lo pawh kan thlûk hman tawh lo fo va, kan thinlunga hmun chang tam ber pawh Pathian thu ni lovin khawvel thil a ni fo.

Kan thinlungah Isuan hmun a chang tlem tawh hle tih chu kan thil ngaih pawimawh zâwng (kan priority list) a tang hian a lang. Isua neih loh aiin in leh lo tha neih loh kan hlau vek zawk.

Aizawl leh district khawpui dangte hi ngun takin en ta ila, in leh lo sa thar apiang tih theih deuhthaw hian lal in (palace) tēnau kan sa dawn em maw tih mai tur a ni tawh a. In chhung leh pawn chei zahawm leh lan ropuitir dan pawh kan hre tawh hle; hmasawmna lawmawm tak a ni a. Chutih rualin in leh lo, bungrua leh thil danga kan intlansiakna leh hetiang lama na taka rilru kan pekna hian kan thlarau nun nasa takin a ei chēr mek a; mi thenkhat thlarau nun phei chu a ei hlum der tawh tih hi zep rual a awm lo ve.

Hetiang hi kan dinhmun a nih mek lai hian kan hmaa zawhna lian pui lo awm ta chu, "Khawvel thil buaipuia thi leh thau pawlha kan tlan mek lai leh kan chungkaw bil tana he leia *paradis* siam kan tum mek lai hian kan thlarau dinhmun hi engtin nge ni zel dawn?" tih hi a ni. A then chuan duhthlanna an siam fel law lawin a hriat theih a. Vawi khat chu Aizawl sumdawng lian pakhat

dawrah thil tul eng emaw vangin nileng deuhthawin ka awm ve a. An sumdawmna bungruate chu an dawrah chuan an lo thiar lut zut zut a, a then an pe chhuak reng bawka, dawrtute chu an zi mur mur a. Chutah, an mi rawih pakhat chu a lo tawng chhuak a, "Ka pu thil neihte hi a tam reih ruih si a, ka pu hian a thil neih zawng zawng hian vanram hi a thleng phal tawh miah lo ang tih ka hre chiang," a ti.

Boleng bial, Arunchal Pradesh-a missionary Pastor-a kan awm ve laiin tum khat chu thusawinaah mi hausa leh Lazara chungchang ka sawi a. Ngun em ema an ngaihthlak lai tak chuan, "Nangni zingah Lazara nih duh zawng ban phar rawh u," ka ti a. Ngaithlatute chu an zavai deuhthawin an phar suau a. "A nih leh, mi hausa nih duh zawng ban phar rawh u," ka'n ti leh a. Pa pakhat, an khuaah pawh a awm thei ber pawl hian, "Kei mi hausa nih chu ka duh e. Mi hausa nih te chu a nuam em! Khaw 'nge, ban

phar mai hi duhtawk lovin ka han ding chhuak hluai teh ang," a ti a, arawn tho chhuak ta ur ur mai a. A lo hmutute chu mak tiin an phun mur mur a. Chuti ang mi chu sum leh paiah an hausa a, van lam mit hmuhah erawh an hausa lo.

Anni ang hi kan ramah hian kan awm ÷euh tawh ang em? Keini ngei pawh hi kan hausakna leh kan nawmsaknate hian Pathian hmel a lo hliah tawhin, heng kan nawmna zawng zawng hian vanram hi kan thleng phal lo ÷an ve mek a ni ang em? Keiniho hi chu Bible-in mi hausa â, a thlarau kalna tur ngaihtuah ngai lo a sawi ang kha kan ni ve lo, nge kan ni ve ÷an tawh zawk?

"Kan la thi dawn tho," tih vanga nun inthlahdah leh thatchhiat hi vanduinah chi khat, thil pawl tak, hma kan sawn zelna daltu a ni. Hun âwl kan neih ang angte a ÷a thei ang bera hman thiam kan tum tur a ni. Chutih laiin kan hun neih zawng zawng

khawvel thil chhek khawmna atana hman khah vek hi hun awl hman ÷at dan ber a ni chuang lo. Bible chhiarna atana hun awl inpek te, ÷awngtai leh fianriala Pathian biakna hun thawl ÷a neih theih te hi thatchhe hna a ni miah lo tih i hre thar ang u. Heng hi changkanna daltu an ni lo va, khawvel hmasawn-nain a ken tel depression laka min venghim theitu kan ralthuam ÷a ber an ni zawk. Chutiang mite chuan sum leh pai khawl lo mah se vânah ro an khawl belh zel a ni.

Arunachal Pradesh-a kan awm lai thovin, kan ÷henawmpa Pu Tama Tasing-a khan thil tam tak min zirtirin ka hria. Lal Isua Krista a hriat hma chuan a chung te, mi hausa deuh deuh te chuan duhsak takin an vur ÷hin a. Lal Isua Krista chanchin a lo hriata, Thlarau Thianghlimin amahah missionary-te thusawi a tihnunsak a ÷ang chuan Kristianah a inpe a. Kohhran hruaitu duhawm tak a lo ni chho va. Chu chuan a

chhung te, ring lo mite chu nasa takin a tithinur a. Pu Tasing-a chu sum leh pai leh hna thawh tur ṭha tak hmanga thlem kir leh an tum ta a.

Mahse, Pu Tasing-a nun hi Mizo ṭhalai, sum leh pai leh khawvel ropuinain kan mit a tihvaih mekte tan hian a entawn tlak ngawt mai. Ama ṭawngkam ngei i lo chhiar ang u, "Ka chhungte chu mi lian deuh deuh te an ni a, MLA te pawh an awm. Chung ho chuan ring lo mi-a min siam leh an tum a, sum tam tham tak min peka, ka dam chhunga rethei lova min siam an tiam a. Mahse, kei chuan Lal Isua neih hi hausakna sang berah ka ngai. Sum leh pai ka nei lo, mahse, Lal Isua ka nei," tih hi. Chu ring thar rilru thianghlim chu ringtu chawlawl lam tawh Mizo

rilruah hian tuh tharin a awm leh thei ang em?

Keini chu kan hawi vel a, mi hausa kan hmu a; ring tharte erawh chu an hawi vel a, hawina lam apiangah Lal Isua an hmu thung. Kan inan lohna chhan lian tak chu keini chuan lei hausakna kan duh a, ring tharte chuan Lal Isua an duh. Lei hausakna uma, Lal Isua nena inpawl na nung nei ngai tawh lo chungin a hnuai a hla lar tak hi kan la lâmpui zel thei tho ang em?

*"Khawvel hausakna, ropuina leh
chawimawina nei lo mah ila,
Hausa ka lo ni, Krista zarah;
Chatuan hmun, in nuam leh ropui
chu ka tana buatsaih a lo ni,
Haleluiah! Ka hausakna chu
LALPA-ah a ni."*



- Hlawhchham dawna i inhriat chuan mathei lovin i hlawhchham ngei ang! Hlawhtlin i duh chuan hlawhtlin duhna rilru puin bul ṭan la, hlawhchham turin inngai ngai lo vang che. — *Maharishi Yogi*
- Mi ropui nia khawvelin a hriatte hi hlawhchhamna piaha pen khat pena hlawhtling ta an ni. — *Napoleon Hill*

TUIPUIBARI - II (Rajiv Nagar) LAMA (Work Camp Report)

—Lalchhuanthanga Renthlei
Secretary
Vengsang Br. KṬP, Khawzawl

May ni 8, 2014 (Ninga) zan a Khawzawl Vengsang Branch Kristian Ṭhalai Pawl Committee vawi 6-nain “Mission field-ah work camp neia kal ni se” tia a lo pass chu tuang taka ruahmannate a kal hnuin Khawzawl Vengsang Branch, kum 1969 a din a nih aṭanga a vawi khat nan mission field tlawh tur chuan kan inbuatsaih ta a ni.

Tuipuibari-a kan missionary te leh Mission Board hotute nen inbe felin kan thawh turte tuang taka ruahman a ni a.

October ni 16, 2014 (Ningani) zing dar 3:25-ah Khawzawl Vengsang Kohhran Upa B. Lalzethanga'n ṭawngṭaina hmangin Kohhran Biak In aṭangin min thlah a. KṬP member 40 leh Kohhran

Upa (Chairman) Upa P.C. Chuauṭhuama, Kohhran aiawh, T. Upa P.C. Rohmingliana leh Kohhran Hmeichhe Vice Chairman, Pi Lalramhluni Varte te nen kan chhuak ta a ni. Tluang takin Pathian venna hnuaiah kan kal a. Kan chaw funte Lengpui daiah kuai ṭhetin kan ei ho a, kan ei khamah kan tum ram chu kan pan leh ta vang vang a, tuang taka kal zelin zan dar 9:42-ah Pathian ram zauh nana ring lo mite hnena rawngbawltute, missionary-ten inhmuin duhsakna chibai inbukin kan work camp-na tur hmun chu kan thleng ta a ni. Min lo dawngsawngtuten min lo lawm thiam hle a, missionary-ten chaw pawh lo la ei bik lova min lo nghak ngar ngar te kha a ropui kan va ti em. Rohmingthangi Memorial School Headmaster, Pu R. Laldinsanga inah inhmelhriattir tawna hun hmangin chawhlu kan kil ho va, chumi hnuaiah kan iptepui banna turah ṭheuh min thlah a. Chuta ṭangin kan riahna tur hmun Rohmingthangi Memorial School lam kan pan ta a ni.

October ni 17, 2014 (Zirtawpni) zing aţangin Rohmingthangi Memorial School Room No. 1 Slab kan chhung ţan a. Hemi ni vek hian School sakna tura ruahmannaah thingbul te karin bankhur te kan lai nghal a. Tluang takin hna kan thawk thei a, kan lawm hle. Zan lamah dar 6:30-ah ring lo mite tana ţawngţai inkhawm hun kan hmang a, inkhawm banah kan riahna School (Rohmingthangi Memorial School) tualah work camp-a kalten hnehna puangin ţawngţai hona hun kan hmang a, kan hlawkpui hle a ni.

October ni 18, 2014 (Inrinni)-ah kan hnathawh chhunzawm leh a ni a, work camp-a kal mistiri 7-ten hna insemin, a ţhenin brick an rem a, a ţhenin bang te plaster-in, thing lam khawihtuten inchhun turte siamin mahni ţulna lam ţheuhah ţhahnemngai takin kan phe sang sang a, phur tak leh thatho taka thawkin leh nî-in min daih tak ngang loh vangin kan hnathawh chu Inrinni tlai ni tlak hnuah

laklawh inti tak chung leh kham lo tak chung kan chawlhlan a lo ţul ta a ni. Zan lamah inkhawmna hun kan hmang a. Inkhawm banah compound mite nen inkawm hona hun kan hmang a, an rawngbawlna report te kan ngaithla a, an inpekna a ropui kan ti hle.

October ni 19, 2014 (Pathianni)-ah puitling lam leh naupang Sunday School lama kalin, naupang lama kalte hi Rohmingthangi Memorial School-ah an inkhawm a, hetah hian ring lo naupangte pawh an rawn inkhawm ve a, naupangte pawhin rawngbawlna ropui tak neiin an ţhian, ring lo mi te an rawn hruai kha a ropui kan va ti tehlul em. Chawhnu lamah kan Branch Representative T.Upa P.C. Rohmingliana'n Pathian thuchah a sawi a. Zan lamah Kan Kohhran Chairman Upa P.C. Chuauţhuama'n thu a sawi leh a. Hetianga work camp a kalte thusawina hun min pe hi kan lawm hle a ni.

Zan inkhawm banah Tuipuibari-II Br. KĪP te nen Fellowship hlimawm tak kan

hmang a, kan hlim hle. Kham lo tak chungin dar 11:00-ah kan ñin a, kan ei siamtuten a tuka kan chawfun turte an buaipui leh a, zan dar 12:30-ah mu fel vein, a tuk October ni 20, 2014 (Thawhñanni) zing 6:15-ah Pu R. Laldinsanga'n (Rohmingthangi Memorial School, Headmaster) ñawngñainain min thlah a. Krista avanga nun chån Nl. Rohmingthangi thlånah chåwlin, kham lo tak chungin mahni in lam panin tluang takin kan kal leh ta a ni. October ni 21, 2014 (Thawhleñni) zing dar 1:30-ah kan lawina kohhran mipuiten Biak Inah min lo hmuakin Pathian hnenah lawm thu sawi ñawngñaina kan hmang a. Pathian Kaihhruaina kan chan leh thil ropui tak min tihsak hi kan va lawm em!

Kohhran dinhmun tlangpui: Kum 1986-ah Tuipuibari-II Kohhran hi din a ni a. Tunah hian Kohhran dan zawh kim 99 niin Kohhran member 177 an awm mek a. Chakma zinga rawngbawlina hi kum 1979-ah ñan a ni a, kum 1987 añangin

Home Mission rawngbawlina North leh South-ah ñthen a ni. Kum 2000-ah Pastoral Ministry hnuaia dah a ni. 2004-ah Mission Board hnuaiah dah leh a ni. In 708 leh mihring 3463 (2011 Census) awmin heng zinga 200 vel chauh hi Kristian an la ni. A dang zawng hi Buddhish sakhaw zuitute an la ni. Tuna Pastor Bial vawngtu hi Rev. F. Lalrammawia a ni.

School rawngbawlina lam:

Rohmingthangi Memorial School hi May ni 19, 1986 khan din a ni a. 2014-2015 session-ah hian KG-I añanga Class VIII thleng hawn niin zirtirtu 15, Peon 1 leh School naupang 270 an awm mek a. Zirlai zinga 57-te chauh hi Kristian an la ni.

Thawktu lam: Evangelist 1 awmin, Headmaster leh Evangelist Teacher 15 an awm a, Staff Nurse pakhat a awm baw.

Lalpa'n thil ropui tak min tihsaka kan lawm hle a ni. Ñawngñaina lamah ñan i lakpui zel ang u♦

Tun hun

—Ramdinsanga Zadeng
Rengdil

Mithiamten “Tun hun tluka pawimawh a awm lo” an lo ti daih tawh a, a dik hle awm e. Hun kal taa kan thil tih dik loh siam that nan tun hun hi hun tha a ni a, hun lo la awm tura kan hmakhua pawh nasa takin tun hun hian a hril bawk. Engtiang fa kauva ‘tun hun’ hi pawimawh nge a nih?

Kan naupan lai, Primary School kan kai lai khan thil pakhat kan chham rual dual dual thin ka hre reng thin. Chu chu, “A hun takah engkim ti la, a hun takah engkim dah rawh, hun hi rangkachak aiin a hlu” tiin. Sawi tak ang khan eng thil pawh kan lo tiin kan lo hming hliau thei a, kan hming thain chawimawina pawh kan lo dawng tawh mai thei. Kan hmingchhiatnaten min awp

bet reng mah se, tun hun hi chhuahna hun tha a ni. “Tun hi hun lawmawm chu a ni a, tun hi chhandamna ni chu a ni,” tiin hmanah khan kan tun hun atan kan Bible-ah ziaak a lo ni thlap tawh, kan tun hun chiah hi a ni Pathianin a duh chu, Setana pawhin kan tun hun tho hi duhin min hel reng a, tawktarh itawm tak tak min chhawpsak fo vang, a thang kama kan aw h palh vaih chuan tal chhuah a buaithlak-in a harsa em em thin. Kan hun tha neih te kan tih-thianghlina, Pathian aw hre tura kan thinlung kawngka kan hawn reng hi kan tih tur hmasa leh tih ngei ngei tur a ni.

Kan ram han thlir ila, Kristian zaah za kan ni lo tih hi phat rual a ni ta lo, kawng hnih, a tha lam leh tha lo lam kawng chiah a awm. Tha ve deuh tho, tha lutuk si lo, tuilairap kawng Pathianin a siam lo. Setana paw'n a siam hek lo, Pathian hian a hring a hranin Kristian kan ni nge ni lo min han thliar sela, zaah sawmthum kan tling ang em

aw ka ti ðhin. In enfiah kan ngai hle awm e. Eng nge Kristian chu? Lal Isua zuitute hi Kristiante chu kan ni. Tam tak hi chu zui si lo zui tum lek kan ni. A dera Kristian nih tum kan tam, “Mi zui rawh” a tih a chhuanlam tur hre duat hi eng zat nge awm ang? Nangmah kha han inbih Chiang teh, eng nge i dinhmun? Thlemna kan tihte pawh hi kan do zawh tawk ang zel a pek kan ni tih Bible-ah kan hmuh kha. Thlemna ka do zo lo titute hian an do lo hrim hrim tih a hriat awm e. Kan chung a harsatna leh manganna te a lo thlenin kan beidawng fo ðhin. Beidawna kan tihte hi keimahni insiam chawp a ni fo bawk. Mi chak tak ni tur chuan harsatna hmachhawn phawt a ngai ðhin. Beisei tur reng reng a awm loh vang ni lovin beisei tur tlem a la awm vang chauhvvin mihring hi a ðap ðhin. Chuvangin, beiseiawm lo nia i hriat avanga i ðah chang chuan hei hi hre rawh. I hmuh loh lamah khan beisei tur a la awm tih hi.

Nikum lawkah kan ram rorel khawl ðhukhawmin zu khap burna dan a hlip a, hlip lo turin nasa takin kohhran paw'n a nawr a nih kha. Mahse, eng mah a sâwt chuang lo va, kan kawtkaiah zu um a rawnin tlar put ang, tah tak chuan invenna thir kawr kan hak a ngai dawn a ni. Eng ang paw'n zu chu lo tamin lo inchhawp hnek hnuk dawn mah se, in lo ngam KṚP nih hi kan tih tur liau liau a ni. Kan hun laia hetiang a lo thleng hi kan rinawm leh rinawm loh fiah nana Pathian thil thlawn pekah ngai ila. Thluchhe mai lo mi rinawm kan nihzia tar lanna hun atan i hmang ang u. Tah chuan malsawmna a awm dawn a ni. Thlemtu thlemna a nasat zawh poh leh khawngaihna a nasa ðhin. Kan hma huna thil lo thleng tur chu tunah hian kan hmachhawn mek a nih hi. Mahse, hun tam ang huin kan thawk tlem ðhin. Kan awm awl hun hi thlem kan tawhna hun ðha ber a ni, eng hna pawh thawk ila, taimakna leh rilru tak taka thawh hian

hmasawna leh hlawhtlinna a awm thin. Keini aia hna hniam thawkte hmusit mai lovin chawikang ila, kut hnathawh zah loh te i zir ang u. Kut hnathawk hmusit mi chuan Pathian a hmusit a ni. Mi dang hmusit mi chu a hriat loh lam a tangin deusawhin a awm thin. Mi, a fin leh fin loh hriatna tha ber chu mi a bula a awm danah hian a ni. Chutiang bawc chuan ram hruaitu sual ai chuan ram

hmangaihtu kutdawh an ngaihsanawm zawk. Ram hruaitute hi Pathian min pek a ni tih zawng ka hnial hauh lo, mahse, Israel te hun lai paw'n Latin thil tihsual a neih leh zilh a ngaih chuan zawlneiho hmangin Pathian-in aw a chhuah thin a nih kha. Tunah chuan zawlnei awm ngai tawh lovin kohhran a awm tawh a, kohhran aw hi Pathian aw a ni tih kan pawm hi a tha hle awm e♦



SYNOD CHOIR RAWNGBAWLNA:

1. **LEITAN SOUTH:** November 3, 2014 zanah KTP, Leitan South Branch inkhawmah tum 1 din chhuahah hla 2 an rem.
2. **AIZAWL VENGLAI:** November 4, 2014-ah Aizawl Venglai Kohhran Silver Jubilee lawmnaah an zai a, tum 2 dinah hla 3 an rem.
3. **CHAWNUI VENGTHLANG:** November 6, 2014-ah Chawnui Vengthlang Kohhran Biak In thar hawmnaah an zai a, tum 1 dinah hla 2 an rem. CKTP Com. member Pu Lalhangvunga Sailo-in a tawiarom a ni.
4. **CHAMPHAI JOINT KTP:** November 8-9, 2014 khan Champhai Jt. KTP Meet 2014 hmanpuiin tum 4 dinah hla 7 an rem. November 9 (Pathianni) zan Fellowship inkhawmah Choir Director Pu R. Lalruatkiman CKTP reports pein thuchah tawi a sawi a, Dr. Zothansanga, Lalduhawma, Nancy Zothanmawii leh Stacy V.L. Muanpuii te an solo bawc.
5. **KANAN:** November 17, 2014 khan KTP, Kanan Branch Silver Jubilee lawmnaah tum 2 dinah hla 5 an rem.

Kristian thalaite leh infiamna

(II Tim 4:8)

—John Lalhruaitluanga
Ramhlun North

Infiamna leh kan khawvel: Infiamna hian mihring nunah hmun a luah thuk em em a. Tun hnai, TV-a kan en theih tak hnua infiamna hi tuipui thar ta hlui kan ni lo va. Hmasang aṅanga kan tuipui em em, mass media avanga kan tuipui lehzual a ni, ti ila kan sawi sual awm lo ve.

Nikum maia kan titinaa kan sawi tui ber chu World Cup chungchang a ni a. World Cup thla, June thla phei kha chuan, kum upa zawk, pitar leh putar aṅanga naupang tē thlengin zanah kan meng rei a. Kan **sawrkar meuh pawhin**, “*World Cup chung hi chuan chungkaw tinin power kan nei tha tur a ni,*” a ti tawp mai kha a ni a. Infiamnain min hnehzia chu a Chiang awm e.

Infiamna hmasawn zel hi... Kan ram chhung bikah pawh infiamna lamah hma kan sawn nasa hle mai. Khelmual tha eng emaw zat kan nei ta a, sports pēng (discipline) hrang hrangah hma kan sawn zel a ni. MPL

boruak phei chu a lian lehzual a, mipuiin kan ngaihven a, infiam mite tan lah malsawmna a ni. Chutih mek lai chuan thil insu erawh a awm fo zel dawn niin a lang. Mizorama kohhran lian berin beihruah thla, zan tina kan inkhawm ṭhin thla leh MPL fixture a innan miao si avangin inkhawm lain Lammualah kan inkhel mup mup ṭan chu a ni ta der mai a. Inkhawm hun ngai pawimawh hlei thei lovin kan la inkhel zel dawn te pawh niin a lang.

Zan lam inkhelh mai hi a la ni lo va. Mizoram hian I League-a khel thei club kan neih ve hunah chuan Pathianniah Lammualah inkhel class sang tak, I-League inkhel kan la en hun a awm dawnin a lang a, eng tik nge a thlen dawn hre lo mah ila, chu chu kan la tawn ngei ngei tur a nih hmeh. Changkan kan duh a, infiamna lamah pawh hmasawn kan duh a, kan thalaite tana kawng hawn kan duh bawkw si a. Tuna kan sawi takte kha a ken tel ngei ngei, kan tawn mek leh kan la tawn tur a ni.

Sap ram chanchin kan hre ṭhin. Kar tuanin hna an thawk a, kar tawp (weekend) an hman dan chu inkhel en a ni ber mai. England leh Europe ram dangah chuan Football an en a, USA-ah chuan Baseball leh Basketball a ni deuh ber ve thung a. Mi tam

zawk tan khuan Pathianni chu Pathian biak ni ni tawh lovin, inkhel en ni a ni ta.

Chutiang a nih mek lai chuan, infiamna hmasawn zel hi dan ngawt theih a ni lo. *“Thalaiten sual kawng an zawh ai chuan infiamna lamah kal sela, an lo hrisel ang a, sual lam kawng an zawh lo vang a...”* tih hi kan inzirtir dan a ni mek a, a ðul pawh a ðul hle tho bawk si a.

Kristian ðhalaithe hi engtin nge kan inzirtir zel tak ang? Infiamna dah pawimawh tho si hian engtin nge rawng kan bawl zel tak ang? Kohhranho hian hmahlir fel tak kan neih a ðul ta hle a ni.

Kristiante erawh chuan : Paula chuan *“Taksa insawizawina hi sawt zawng a sawt ve bawk a; Pathian ngaihsakna erawh hi chu, nunna tuna awm sa leh la awm leh tur pek tiamna a neih avangin kawng tinrengah a sawt a ni,”* a ti a. Kum 2000 chuang liam tawhah khan *“Sports hi a ðha a, ðul pawh a ðul; amaherawhchu, Pathian ngaihsakna erawh chu chatuan daih a nih avangin a pawimawh zawk a nia aw...”* tiin Paula chuan a lo sawi daih tawh a ni.

Kan sawi tak ang khan, Pathiannia IPL khelh hun hi lo thleng tak tak dawn ta sela, kohhranho hian kan dang thei kher lo vang. Chutiang chu a lo

ni ta a nih chuan, he khawvela Pathian kut leh ke, rawngbawl tura chhandam Kristian ðhalaithe hian tih tur kan ngah sawt dawn tihna a lo ni ang a. Kan member-ten Biak In lam an hnaih deuh deuhna tur khawpin kan ðang nasa leh zual mai tur a ni a, kohhranho pawh hian Pathianni programme kan thlâk ngam a la ðul dawn a ni.

Eng dinhmunah pawh ding sela, *“Khawvelin heng hi ti mah sela, kei erawh chuan Lalpa kawng ka zawh zel dawn”* ti tlat thei tur ringtu ðha kan Sunday School-ah hian kan chher chhuah a ðul a, ðhalai hip tur zawnga ruahmanna siam kawngah pawh kan ðhanharh a ðul a. Chutiang bawkin, chhungkua-ah ðan kan lak tlan thar a ngai bawk ang.

Sports hmanga Isua chawimawi: Mi ramah chuan tuna kan rama thleng palh thei kan sawi zawng zawngte kha a thleng zo tawh a. Amaherawhchu, evangelical Christian pawlhoten hma an lakna avangin khawvel hriata ringtu an nih zahpui ngai lo, khawvel hmuha Isua chawimawitute an lo pung ve zel a. Sports hmanga Isua chawimawitu mi pahnih chanchin chauh tar lang hram ila.

Daniel Sturridge-a hi Premier League player-ah chuan mi hmuha lang tlang taka a rinna zahpui lo berte zinga mi a ni a. A pet goal apiangin van lama lawm thu sawiin van lam a kaw k thin a. Tweeter-ah in follow a nih chuan #God is love tih te #God is good tih te leh Pathian thu dang hmangin a tweet uar em em a. Kum 2013 September khan Barclays player of the month-a thlan a ni a. Khami tum pawh khan, *"Min tichaktu Isua avangin engkim ka ti thei"* tiin a tweet a. *"Tuk tin leh tlai tin ka tawngtai thin a. Ka neih zinga ka hlut berte zinga mi chu ka Bible hi a ni"* tiin a sawi.

Tun World Cup (2014) zo taa Brazil Vice Captain David Luiz-a kha Chelsea-a a khel hma khan Portugal-ah Benfica club-ah a khel thin a. Chutih lai chuan an training-naa kal nana VAN a hman thinah chuan *"Christ is life - Isua hi nunna a ni"* tih ualau takin a tar thin a. Chelsea-a a insawn hnu pawh khan Kristian a nih a zahpui ngai lo. Brazil-in tun World Cup-a beisei an phak loh dan te kan hre vek a. World Cup-a champion avanga Pathian fak te, tawngtai te, pet goal avanga lawm thu sawi te chu a awl deuh mai thei. Mualpho taka (7-1)-a an chak loh zawh chiah khan khelmualah David Luiz-a kha a

thingthi nghal rap a, Pathian hnenah a tawngtai a nih kha. Kha kha ringtu mit atang chuan World Cup chhunga thil hmuhnawm ber a ni awm e.

Inelna chi hrang hrangah kan tel fo thin. Mahse, Mizo thalai tam zawk rilruah hian *"Isua tan"* tih te chu a hla deuh thin ni hian a hriat a. *"Kan chak tlat mai a, a lawm nan rui chhum hmarok ang aw"* kan tih loh leh, *"Kan chak lo va. Rilru a na tlat, zu in vak teh ang"* kan ti a. Isua ropuina tura tih a hla hle thin. Kristian rama awm, kohhran ho zirtirna leh Kristian chhungkaw kaihhruainaa sei liante hi chuan, *"Isua tan he infiamnaah hian ka bei dawn a, Isua ka chawimawo dawn a ni"* tih rilru kan put thar a tul mang e.

Sports hmanga rawngbawl: Sports/infiamna hi media ang thovin do chi a ni lo va, lam tanga siam chi, hmanruaa hman chi ve tho a ni. Engtin nge rawngbawl naah kan hman tangkai tak ang? Kohhran leh Kristian pawl tam tak chuan sports event te an buatsaih a, chuta lo kal khawmte chu Pathian thu hrilhna hun remchang an nei thin.

Biak in thleng phak lo, mi hlate leh kohhran ngaihsak lote hian pulpit sermon an dawng ngai dawn lo va, kan Pastor, kan

Upate leh thalai hruaituten Biak Ina Pathian thu tha leh ropui tak tak an sawite hi an tan hriat ngaihna a awm lo. Thalaite phurna zawng tak leh an tuina tak sports hmang hian thalaite hi koh khawma, chumi hun remchanga laa Pathian thu lo hrilh te hi kohhranho leh thalaite hian kan tih turah kan ngai dawn em?

MPL te kan ti a, thil dang pawh a la awm zel dawn. Kan sawi tawh ang khan inkhawm ngai lo tam tak, Lammual khat tlat heng programme hian a hip khawm thin a. Hei aia platform tha hi a tam lo mai thei. MPL programme-ah te hian half time hun tawi te chung tal a entu mipuite hnena Pathian thu tawi sawina hun neih te hi Central KṯP hmalaknaa beisei chi a ni ang em? A nih loh pawhin, worship dance leh musical drama tawi, mi hneh thei baw si te chan theih ni ta sela, mi pakhat nun a danglam phah a nih pawhin rawngbawl na hlawk tak a ni dawn si.

Sap rama Kristian infiam miten "Christians in Sports" tih te, "Sports Crusaders" tih te, "Athletes in action" tih te an din ang deuh khuan kan rama Kristian infiam mite hian intel khawma, "Krista tana infiam mi pawl" an din ve a hun tawh em?

Chutiang pawl te chu awm ta sela, inkhel chawlh laiten an testimony te sawi thin ta sela, an thiante zingah nunin lantir (witness) nasa lehzual bawh sela, a va sawt dawn em!

KṯP Sports hi: KṯP branch tin deuhthaw hian kum tin KṯP intihlimna (KṯP Sports) kan nei deuh vek thinin a rinawm. A tlangpuiin, member nghet sa intihlimna programme-ah kan hmang tlangpuiin a lang a. Sports programme ngawr ngawr, Pathian thu tak leng tam lo programme a ni palh ang tih pawh a hlauhawm hle. Heng hunah te hian 'member hla hnuh hnaih' hi project-ah neih ta ila, sports hmangin member hlate hnuk hnai ila, sports karah Pathian thutak an hriat theihna hun tur siam thin bawh ila, KṯP Sports hlimawm leh hlawk zawk kan hmang tlang thei ngeiin a rinawm.

Lallukhum chhe thei lo chu wawiina Kristian Thalai Pawl member nghette hi chuan kan hmu tawh a, a takin kan khum hun pawh a hla tawh lo mai thei. Mahse, lallukhum hlutzia pawh la hre ve lo mi tam takte hi hip khawma, hrilh an ngai a. Chumi atan chuan infiamna hi hmanraw pakhatatah kan hmang duh ang em?



ṬP Rorel Inkhawm 2015 palai leh agenda: KṬP Rorel Inkhawm 2015 chu Mission Veng Kohhran Biak Inah February 27 - March 1, 2015 chhungin neih tur a ni a. Rorel palai tur Bial aiawh 1, Branch aiawh 1 intirh tur a ni a. Rorel Inkhawm atana Agenda kan neih chuan Bial Conference zawh veleh Central KṬP-ah hriattir tur a ni. February 10, 2015 ral hmaa hmuh hman tura thawn theih ṭheuh ni thei se a lawmawm khawp ang.

KṬP ROREL INKHAWM PROGRAMME

**A hmun : Mission Veng Kohhran Biak In
A hun : 27th Feb - 1st March, 2015**

February ni 27, 2015 (Zirtawpni)

6:30 - 7:00 p.m. Zaiho

7:00 p.m. PALAI LAW M LEH REPORT INKHAWM

Chairman : Pu R. Lalruatkima, Com. Member
Kumpuan thupui leh film hlanna

Hlantu : Synod Secretary

Reports : 1. General Secretary report
2. Finance Secretary report
3. Bial reports khaikhawmna

Zaipawl : 1. Synod Choir
2. Tlangnuam Bial

February ni 28, 2015 (Inrinni)

9:30 - 10:00 a.m. : Zai ho

10:00 - 12:00 noon ROREL INKHAWM

Chairman : Rev J. Lalremsiama, Leader

1:00 - 1:30 p.m. : Zai ho

1:30 p.m. ROREL INKHAWM

Chairman : Rev J. Lalremsiama, Leader

February ni 28, 2015 (Inrinni)

6:30 - 7:00 p.m. : Zai ho

7:00 pm PATHIAN BIAK INKHAWM

- Chairman : Upa K. Rorelkima, Com. Member
Thuhrlitu : Pu Samuel Laldingiana, Asst. Leader
Zaipawl : 1. Synod Choir
2. Dawrpui Vengthar Bial
3. Ramhlun Bial

February ni 28, 2015 (Inrinni)

Zan Inkhawm ban : **FELLOWSHIP**

- Chairman : Pu V. Lalrinmawia, Com. Member
Thupui : KTP leh Social Media
Sawitu : T. Upa Richard B. Lalhriatpuia, Com Member
Item : 1. Short play - Chaltlang Bial
2. Band - Chanmari West Bial
3. Duet - Sihphir Vengthar Bial
4. Male voice- Armed Veng Bial

March ni 1, 2015 (Pathianni)

9:30 - 10:00 a.m. : Zai ho

10:00 a.m. PATHIAN BIAK INKHAWM

- Chairman : Dr. Julie Remsangpuii, Treasurer
Thuhrlitu : Rev. P.C. Pachhunga,
Executive Secretary i/c KTP
Zaipawl : 1. Synod Choir
2. Sihphir Bial
3. Ramthar Veng Bial
4. Mission Veng Kohhran

March ni 1, 2015 (Pathianni)

1:00 - 1:30 p.m. : Zai ho

1:30 p.m. PATHIAN BIAK INKHAWM

Chairman : Tv. R. Lalramghaka, Fin. Secy

Thuhrlitu : Rev. Lalrinmawia, Moderator

Zaipawl : 1. Synod Choir
2. Republic Veng Bial
3. Hlimen Bial
4. Aibawk Bial

March ni 1, 2015 (Pathianni)

Dar 6:30 - 7:00 pm : Zai ho

7:00 pm PATHIAN BIAK INKHAWM

Chairman : Dr. Lalliansanga, Asst. Secy

Thuhrlitu : Rev J. Lalremsiama, Leader

Zaipawl : 1. Synod Choir
2. Presbyterian Choir, Lunglei
3. Khatla Bial

March ni 1, 2015 (Pathianni)

Zan Inkhawm ban

FELLOWSHIP LEH PRAISE AND WORSHIP

Chairman : Pu Ngurhmingliana, Com. Member

Items : 1. Solo - Ni. Laldusaki,
Durtlang Bial
2. Acapella - Thuampui Bial
3. Band - Vaivakawn Bial
4. Musical Skit - I.T.I. Veng Bial

NOTE :

1. Praise Group a awm ang a, thlengtu kutah dah a ni.
2. Sound system hi a thlengtu kutah dah a ni.
3. Pathianni chawhma leh zan inkhawmah thilpek lak khawm a ni ang.



HRINGLANG TLÁNG

INRUAKA THUHRIL

Pathian hnathawh dan hi a mak ngawt mai. Mihringin kan beisei dan piah lamah hian mak takin rem a lo ruat ðhin tlat a ni.

Kum zabi liam ta khan Stephen Grellat-a chuan America ram ngaw rilah Pathian Thu hril tura hriattîrna a dawng mauh mai a. Atirah chuan a ring lutuk lem lo; mahse Thlarau Thianghlim nazorna chu a nat telh telh awangin ram ngaw ril lam pan chuan a chhuak ta a.

Rei fe hnuah ram chhuakho inkhuarna ðhin in hlui eng emaw zat hi a hmu ta a; mahse an lo rauhsan vek tawh hlawm a. Pathian chuan chu in ruakah chuan thu hril turin a duh a ni tih a rawn hriattîr leh ta zel a. Pathianin a hriattîr ang tak chuan chûng in ruakah chuan Pathianin a thinlunga A Thu a dah chu a sawi ta chiam mai a. Stephen Grellat-a chuan in lama a let leh hnu rei tak thlengin Pathianin in ruaka thu sawi tura a duh chhan chu a hre thiam chuang lo.

Ram ngaw ril in ruaka thu a sawi aþanga kum eng emaw zat a liam hnuah nikhat chu Stephen Grellat-a kawng kal lai chu mi pakhat hian a banah a lo uan chawt a, "A tawp a tawpah zawng ka hmu ta nge nge che," a'n ti ringawt lehngal a.

A ngaihna hre lo zet hian, "Min hai palh a ni ang," a lo ti thuai a.

Ani lah chuan, "Ka hai lo che. Kum eng emaw zat liam taa ram ngaw ril in ruaka thu sawi chiamtu kha i ni tiraw?" te chu a ti tak deuh deuh va.

Stephen Grellat-a chuan, "Ni e. Mahse, khami ðum khan tu mah an awm hlei nem," tiin a lo chhang a.

Chu pa chuan, "Ram ngawa ram chhuakho chawlhna in enkawltu hotupa ka ni ðhin a, khatih lai khan hmun dangah kan insawm tawh a. Khami ni khan kan in ruaka bungrua theihngihl rawn lam turin ka lo kal leh a, in ruak chhunga i thu sawi thawm kha hriat khan pal awng aþangin ka en reng che a ni. Nang chuan mi la hmu ngai lo vang a, min la hre ngai hek lo vang; mahse kei chuan i thusawi pum pui kha ka ngaihla tluan zak asin.

"I thusawi hmang khan Pathianin ka thinlungah ka sualzia min hmuhtr a; tichuan, Bible ka lei a, ka sualte simin ka piangthar tawh a, Kristian ka ni tawh asin. Keimah chauh ni lovin, ka hnuaiia thawk ðhahnem tak chu tunah hian Kristian an ni tawh bawk a ni. Khami ðuma i thusawi awang khan mi tam takin Krista an neih phah a, an zinga 3 phei chu missionary an ni tawh nghe nghe asin," a ti ta a.

RIMAWI ■■■

Lalpa Beramhote chu

—F. Vanlalrochana, Zotlang

KHB 183-na tluka Pathian Khawngaihna leh ngaihdamna sawi fiahtu hla hi a awm ang em? He hla chheh vel hi i han thlir teh ang.

George Claphane, zu ngawl vei: Fergus, Ontario, Canada-ah chuan thlân khawhar tak pakhat a awm a, chutah chuan George Claphane-a ruang chu zalh a ni.

1842-ah George Claphane-a hi Canada-ah a pem a, lo zau tak a nei a, hma lam hun thlirin theihtawp chhuahin a bei a. Mahse, a lo neihna kawngah chuan nasa takin a hlawhchham a, a beidawng chuan nasa takin zu a in phah a, a zu in chu a thihpui ta nge nge a.

A unaunu pawh, George a thihna hian a khawih hle a. Elizabeth Claphane-i chuan, poem pakhat a phuah a, chu chu Pathian mi pakhat suala tlu

Pathianin a zawn chhuah leh tak thu a ni. Chu chu, Lalpa beramhote tia kan hriat tak hi a ni a. A thih hnuah chauh khawvel hriatin a lar chhuak thung a ni.

A poem phuah chu, The Children Hour-ah tih chhuah hmasak ber a ni a, chanchinbu hrang hrangah tihchhuah leh chhawn a ni.

Berampu Moody leh Sankey: Kum zabi 19-naa Evangelism chanchinah chuan, D.L. Moody-a leh IRA D. SANKEY-a hi an langsar ber awm e. D.L. Moody a crusade neihna apiangah IRA SANKEY hi a zai thîn a ni. Sankey hi zai thiam a ni satliah mai lo a, hla phuah thiam a ni a, rimawi tum thiam em em a ni bawk.

He hla thu lo pian dan chu a chungah kan sawi tawh a, Sankey-a ka ngei aṭangin, Hla a lo nih tak zet dan i lo ngaithla teh ang.

"Kum 1874 khan, "The Ninety and Nine," tih hla hril chu hmuh chhuah a ni a, a thluk siam a niin, khawvel pum huapa rawngbawlna kawnga hmanraw ṭangkai tak a lo ni ta a ni. A hla thu hmuh chhuah dan hi tih palh thilthu liau liau chu a

ang naa, Pathian hnen aṅanga lo thleng a ni, ka ti lo thei lo. Pu Moody-an Glasgow khuaah hetih hun lai hian Pathian thu hrilin hun eng emaw chen a hmang a, zaia rawngbawlin keiin ka lo pui ve char char bawk a. Edinburgh pan turin Glasgow rel chawlhmunah kan awm a, Hetah hian rawngbawltu rualhoin ni thum chhung inkhawm an buatsaiha tel tur kan ni a, chumi zawh chuan Scotland ram ril zawk kan pan dawn a ni.

Glasgow-ah hian thla li zet rawng kan bawl a, chumi hma thla thum chhung chu Edinburh-ah hian rawngbawlin hun kan lo hmang tawh tho a. Rel chhunga kan luh dawn chuan, kar tin chanchinbu pakhat hi ka lei a. Rela kan chuan hian second class-ah emaw, third class-ah emaw kan chuang tlangpui a. Hemi tum erawh hi chuan Glasgow-a kan rawngbawlnaah kan lo chau deuh bawk a, chawlh hahdam pah kan duh a, first class-ah kan chuang a, hun thawl reh deuh reih rawih kan duh vang a ni. America ram chanchin tharte a awm takin tiin phur takin ka chanchinbu lei thar chu ka chhiar ta a, ka beisei ang reng reng erawh ka hmu ta lo a, ka

ram ngaih em em lam hawi awm chhun deuh chu, Henry Ward Beecher-a sermon an dah chu a ni deuh mai.

Chanchinbu chu ka chhiar zui ta lem lo a, Edinburgh kan luh dawnah chuan Advertisement lam eng emaw ka en duh vangin kan bih nawn leh a. Kil khatah chuan Hla hril pakhat hi a lo awm ve ran a, uluk deuha ka chhiar chuan rawngbawlna kawngah hla tha tak a ni thei dawnin ka hria a, thluk a neih chuan Pu Moody-a pawh chu ka hrilh nghe nghe a, a ni chuan, 'Han chhiar ri teh,' a ti a. Ka theih tawpa uluk leh mawia ka chhiar hnu chuan ka thianpa hmel chu ka han en a, ani chuan, a lehkha thawn dawn chu a lo bih nget nget mai a, ka thu chhiar reng reng chu a lo ngaihsak lo a. Ka lungawi lo lek lek a. Ka hlahril hmuh chu ka chep thla a, hla lam pang thil ka bel khawmna lekhhabuah chuan ka bel ta a, he lekhhabu hi khawvel hriata hla lar tak tak lo pian chhhuahna bulpui a ni.

Edinburgh Inkhawmpui a ni hnihna chhunlaiah chuan, Pu Moody-a leh thusawitu dangte chuan Berampu tha tih thupui hmangin thu an sawi hlawm a,

Moody-an thu a sawi zawh chuan Dr. Bonar a chu thu tawi te sawi turin a sawm a. A sawi rei lo naa, a sawi thiamin a sawi nung bawka, mipui thinlung pawh a khawih khawp mai. A sawi zawh chiah chuan Pu Moody-a chuan ka lam a lo hawi a, "He thu mil tur hla hi, inkhawm ban dawna sak turin i nei mial lo maw?" a ti a, chutiang awm ka hre mai si lo a, ka ngaihtuahna a buai khawp mai a. Sam 23-na hla kha ka rilruah chuan a lo awm a, mahse, he hla hi chu kan sa zing tawh bawka si a. Scot pachal inkhawma lo tel zawng zawng chuan chu hla chu sa ngatila chu min lo zawm thei vek dawn tih ka hria a; churang chuan, solo chuan chu hla chu sak a rem chiah loin ka hria a. Chutih lai chuan, aw hian, "Rel a i hla hmuh kha sa rawh" rawn ti hian ka hria a. Mahse, chu hla chu sak ngawt chi a ni lo a, a thluk a la awm lo hrim hrim si a. Ka ngaihtuahnaa thil dang lo awm leh chu, khang hla thu mawi tak kha ka sa ngei ngei tur a ni, tih hi a ni bawka si a. Organah chuan ka leh kha them chu ka dah a, Pathian hnenah tawngtaiin, min pui turin ka ngen a, mipuite tana thlarau lama hlawkna leh thatpuina a thlen ngeina tura Pathian puihna

chu ka dil ta a. Tichuan, A flat key ka hmet a, ka zai ve ta ngawt mai a ni.

Tichuan, a tlar tin chu a thluk ka dawng chawp chilh zel a, ka sa ta mawp mawp mai a, chuta ka hla sak thluk ang chiah chuan tun thleng hian tih danglam lohin a awm ta zel a ni. Ka zai zawh chuan, mipui rilru pawh a khawih hle tih ka hre thei a. Pu Moody a rilru pawh a hneh ngang mai. Pulpit atang chuan a lo chhuk a, ka thutna lamah chuan a lo kal a, Organ chu bawhin, "Sankey, kha hla kha khawia i hmuh nge? Khatiang hla ropui kha ka dam chung hian ka la ngaithla ngai lo reng reng" a ti ta hial a. A mittui a parawl hial a ni. Moody-a hnenah chuan, "Nimina ka chhiarsak che kha a nia, i ngaithla si lo alawm," ka ti a. Tichuan, Pu Moody-a chuan a ban a phar a, Malsawmna a sawi a, inkhawm kan bang ta a. Chu chu, "Lalpa beramhote" tih hla lo pian dan chu a ni."

Pathianin he hla hi khawvel hmun hrang hrangah nasa takin a hmang a, mi tam takin Pathian an hmuh phah a ni. Chung te chu Sankey-a hian a leh khabu, 1907-a tih chhuahah a ziak vek a ni ♦

Keimahni



■ November 3, 2014 (Thawhṭan) zan khan KṭP, Leitau South Branch inkhawmah Asst. Leader Pu Samuel Laldinglian an thuchah a sawi a, Synod Choir-in an ṭawiawm.

■ November 3 -9, 2014 chung khan Rallung Branch Diamond Jubilee ropui takin an lawm a, Inrinniah Jubilee ruai an theh a ni. CKṭP aṭangin ni 8&9 hmanpuiin Pu Lalthangvunga Sailo leh Pu Ngurhmingliana, Committee member te an kal a, hruaitu kalte hi Tv. Zonunmawia, Khatla 'E' (soloist)-in a ṭawiawm a ni. Pathianni chawhnu inkhawmah Pu Ngura'n thuchah sawiin, zanah Pu Vunga'n a sawi a ni.

■ November 7-9, 2014 khan Lallen Branch KṭP Diamond Jubilee lawmna hmanpuiin Pu Samuel Laldingliana (Asst. Leader) leh Pu P.C. Biakmuanpuia te an kal a, Nl. Vanlalpari (soloist)-in a ṭawiawm. November 8 (Inrinni) Variety programme-ah Pu P.C. Biakmuanpuian Jubilee Souvenir a tlangzarh a, November 9 (Pathianni) chawhma inkhawmah Pu Samuel Laldinglian an Jubilee thupui a sawi. Nl. Vanlalpari hian ṭum 5 dinah hla 6 a sa a ni.

■ November 17, 2014 zan khan Leader Rev. J. Lalremsiaman Kanan Branch KṭP Silver Jubilee lawmnaah thuchah a sawi a, Asst. Secy. Dr. Lalliansanga leh Pu V. Lalrinmawia (Com. member)-ten an ṭawiawm.

■ KṭP Inkaihhraina 2014 chu uluk taka endik a nih hnuah peih a ni ta a. Bial, Branch, Pastor leh Pro. Pastor copy thawn chhuah tawh a ni a. Mi mala duh tan KṭP Office-ah bu 1 Rs. 10-in lei theih a ni. Synod Executive Committee (SEC) duh dan angin KṭP Inhraina Dan tih ṭhin chu KṭP Inkaihhraina tia thlak a ni ta bawok (SEC 251:40).

PRAISE '14 (Pathian fak leh chawimawina hunpui)

55th KṚP General Conference, Khawzawla thurel "**Ṛhalai zawkte hip khawm thei programme siam ni rawh se**" tih bawhzui nan Central KṚP chuan December ni 5, 2014 (Zirtawpni) 6:00 p.m. khan Pathian fak leh chawimawina hunpui **PRAISE '14** Rajiv Gandhi Stadium, Mualpui, Aizawlah a buatsaih.

Hetiang programme hi Aizawl-ah chauh ni lo, hmun hrang hranga buatsaih dan tur pawh ngaihtuah a ni a. Amaherawhchu, budget awm lawk lo thurel bawhzui ngai hautak tak a nih avangin hmun khat, Aizawl-ah neih tura ruahman a ni ta a.

A hmanna hmun chungchang ah hian khawpui chhung hmun hrang hrang ngaihtuah hmasak a ni a, programme lian tham siam hian khawpui chhung nunphung, lirthei che vel leh parking thlenga harsatna a thlen theih avangin tuna hmanna tur hmun hi thlan a ni ta a ni. Programme hmanna tur hmun hi kan ram tan ro hlu tak a ni tih hriaiin Central KṚP chuan he programme a kal zawng zawngte pawh uluk tak leh a hmun hma fai taka vawng turin a beisei a. Central KṚP Committee chuan a hmunhma te ṫha taka vawn a nih theih nan duty tur mi 700 vel zet a ruat a ni.

Hun hman dan

Convener : Tv. Chris M.S. Dawngkima, Ramhlun North Branch

Comperes : Tv. Robert Lalduhzuala, Ramthar North Branch
Nl. Lalbiakdiki (Bd-i), Khatla Branch

1. Mipui zai ho : 5:30 - 6:00 p.m.
2. Ṛanna (6:00 p.m.): Pu Samuel Laldingliana, Chairman Praise '14
3. Thu puan : Upa Zonunmawia, Gen. Secretary, CKṚP
4. Opening Act : Ramthar Veng Br. KṚP, 1st Position, FAKLAM
5. Introduction : "*Instrumental*"
6. A huhova zai : "*I ropui nan kan hlan*"
7. Jerry Lalrinawma : "*I hnen lo thleng se*"
8. Malsawmtluanga Sailo : "*I tan ka hlan*"
9. Lalduhsaki : "*Kan fak ang che*"
10. Israela Pachuau : "*Van hla ma'wi*"
11. Baby Malsawmtluangi : "*A tawp thleng i ṫhian*"
12. Andrew Laltlankima : "*Ka chhandamtu - Chu hmun (Medley)*"
13. Margaret Malsawmtluangi : "*Isu, eng la*"
14. Elija Lalrinawma : "*Vanglai nun*"
15. Lalruatsangi Pachuau : "*Lalpa, i ta ka ni*"
16. JUBILEE Band : "*Tu nge*"
17. Musical Skit : Zarkawt Branch

Praise '14 chunglam atangin




CENTRAL KTP
PRESENTS
PRaise 14

Ramthar Veng Branch

5th Dec, 2014 * Rajiv Gandhi Stadium



Zarkawti Branch



5th Dec, 2014 * Rajiv Gandhi Stadium

Synod Choir





Postal Regn. no. MZR/81/2015-2017
RNI No. MIZMIZ/2009/29074



Maubuang Branch Diamond Jubilee - October ni 3, 2014



Kanan Branch Silver Jubilee - November ni 17, 2014



Ruallung Branch Diamond Jubilee - November ni 3-9, 2014



Tuipuibari Work Camp - Khawzawl Vengsang Branch

Printed & Published by Zonunmawia, Synod Office, Mission Veng on behalf of Kristian Thalai Fellowship
Edited by Lalmuanpuia and printed at Synod Press, Mission Veng, Aizawl, Mizoram . Copies - 40,000